

Mostra ZONE D'OMBRA - Johanna Fink y Michele Azzalini

Vernissage: 25.10.2024 dala 20:00 tl self dla mostres dla Lia Mostra d'Ert

Dureda dla mostra: 26.10 – 17.11.2024

Orar de giaurida:

merdi – venderdi: 16:00-19:00

sada y dumënia: 10:00-12:00 y 16:00-19:00


Michele Azzalini (Vittorio Veneto 1996) à fat l curs de scultura pra l'Accademia di Belle Arti de Venezia.

Johanna Fink (Bulsan 1998) fej l'Accademia di Belle Arti de Viena tla tlas de Scultura de Julian Göthe.

Zone d'Ombra ie na reflescion sun la perzezion, doi nrescides defrëntes per mustré n imaginer ascundù. La mostra esplurea n microcosm, n sofonz che ie mé da udëi sce n ti va permez, sce n ti va daujin al'opra, metan a fuech cie che ne ie suvënz nia saurì da sentì, cie che ti mucia ala ududa. I doi artisć prejënta lëures che refletea si nteres de viers de chësc mond ascundù tres la criazion de na cuntreda che semea fërma tl tëmp. Chësta maniera de ti jì permez se damanda na fruizion esplorativa da pert de chi che cëla, acioche duc i elemënc che fej ora l'opres posse unì sentii.

Michele Azzalini esplurea l cunfin danter l artificziel y l naturel tres l'interazion de materiali coche lën, zement y mitel, prejëntan doi series defrëntes che esplurea la medema tematica. La seria "Dispositivi" ne n'ie nia mé na zelebrazion dla plantes, ma na reflescion sun chël che resta scundù al uedl dla persona: la forzes che mudelea si svilup, la forzes nia da udëi coche la lum y i flusc minerei. Si "Casseforme" uel dlacé ite l muvimënt fluid dla linfa, chëla che tira do cun sé l rest dla memoria salveda tl corp dla plantes ntan duta si vita. L nasc nscì formes che semea viver na si vita autonoma, te chëla che l cunfin danter l naturel y l artificziel sfanta, mustran na interrelazion nueva danter la persona y d'otra sortes.

Johanna Fink lëura cun materiali giatei, uzan ora chël che vën suvënz stlut ora o iniurà. Si maniera de ti jì permez, suvënz ironica y jughënta, refletea sun l'ejistënza materiela y sun nosta relazion cun ogec dla vita da uni di y cun creatures che viv. La tol cie che ie da garat y l trasfurmea, cuncian ite inò toc de na vita vivuda te narracions visives nueves. Tres la scuierta da nuef de chël che ie aldò dla semea zënza senificat mostrela su dumandes n con' de nosta relazion cun la natura, la sozietà y l artejanat. Si opres crieia na tenscion danter chël che passa via y chël che dura tl tëmp, danter zità y campania, danter l'umanità y si ogec.



CIRCOLO LIA MOSTRA D'ERT - URTIJËI
KREIS FÜR KUNST UND KULTUR - ST.ULRICH
CIRCOLO ARTISTICO E CULTURALE - ORTISEI

Plaza S. Antone 102,
I - 39046 Urtijëi (BZ)
[http:// www.circolo.org](http://www.circolo.org)
info@circolo.eu
tel. +39 377-5936350